

**Ala xa masenyi**  
**Annabi Pɔlu naxan sebe Tito**  
**ma**  
**Masenyi nde yi Kitaabui xa**  
**fe ra**

Yi Kitaabui findixi bataaxe nan na Ala xa xɛɛra Pɔlu naxan sebe danxaniyatɔɛ nde ma naxan nu xili Tito. Girekika nan nu a ra naxan nu kafuxi Pɔlu ma Ala xa wali kui.

Pɔlu yi bataaxe sebe a ma tɛmɛi naxe, Tito nu na Kireti. Kireti findixi suri nan na naxan na Miditerane baa tagi. Pɔlu nun Tito nu bara siga Kireti kawandi tide, Pɔlu fa Tito lu naa a xa na danxaniyatɔɛ jamae mali e xa senbe soto. Pɔlu yi bataaxe sebe ne Tito ma a xa marasi nun limaniya fi a ma alako a fan xa Kireti danxaniyatɔɛ rasi, a e ralimaniya, a nɔndi makenen e be.

Yi Kitaabui fe gbege masenma won be danxaniya nun danxaniyatɔɛ jama xa fe ra. A a masenma a won sese mu nɔma kiside won ma wali fanyie saabui ra. Kisi sɔtɔma Ala xa hinne nan tun saabui ra. Xa won bara danxaniya, won bara kisi, won fe birin nabama ne fa alako won jere ki xa tinxin, won xa wali fanyie suxu.

Ala xa yi Kitaabui xa masenyi rasabati won boje kui. Ala xa won mali won ma danxaniya xa tilin, won ma wali fanyie xun xa masa. Amina.

**Ala xa masenyi**  
**Annabi Pɔlu naxan sebe Tito**

## ma

### *Xεεbui*

<sup>1</sup> N tan Pōlu nan yi ki, Ala xa konyi nun a xa Mixi Sugandixi Isa xa xεεra. N na walife alako Ala xa pama sugandixi xa danxaniya, e man xa nōndi kolon naxan e rapereɓa Ala xa fe kui.

<sup>2</sup> Yi danxaniya nun yi nōndi a niyama ne mixi xa a xaxili ti Ala xa kisi ra. Ala, naxan xa laayidi mu kanama, a tan nan yi abadan kisi laayidi won be beenun dunija xa daa.

<sup>3</sup> Waxati to kamali, a naxa a xa xibaaru fanyi makenen kawandi saabui ra, naxan bara taxu n na Ala won Nakisima xa yaamari ma.

<sup>4</sup> N bara i tan Tito xεεbu, naxan bara findi n ma di yati yati ra won ma danxaniya kui. Baba Ala nun a xa Mixi Sugandixi Isa, won Nakisima xa hinne nun boɓesa fi i ma.

### *Tito xa wali Kireti danxaniyatɔe jamae tagi*

<sup>5</sup> N bara i lu Kireti alako i xa fee yailan naxee yailan daaxi luxi na, i xa mixie sugandi taae birin kui, e xa findi na danxaniyatɔe jamae xa kuntigie ra. Alo n i yamari ki naxe,

<sup>6</sup> danxaniyatɔe jamae kuntigi lanma ne a xa findi tinxintɔe ra xili fanyi na naxan xun, gine keren kanyi, naxan xa die danxaniyaxi, mixie mu naxee kolon kalabante xurutaree ra.

<sup>7</sup> Fo yi xunmatie xa findi xeme tinxinxie nan na barima Ala xa wali nan taxuxi e ra. E naxa findi mixie ra naxee e yete igboma, naxee boɓe tema mafuren, naxee siisima, naxee mawolen, naxee biraxi geeni tinxintare foxo ra.

<sup>8</sup> Fo e xa findi xεmεε ra naxee fata xοje rasεnεde, fe fanyi rafan naxee ma, naxee e yeτε xaninma xaxilimaya ra, naxee tinxin, naxee seniyen, naxee nοxi e yeτε ra.

<sup>9</sup> Fo nondi masenyi xa lu e yi ra alo e xaranxi a ra ki naxε. Na nan a toma e fan nοma kawandi tide a nondi ki ma, e man nο na nondi matandie ra.

<sup>10</sup> Na matanditi mοoli gbegbe na na, a gbengbenyi sunna mixie ya ma. E δε wuya, mixi yanfafe rafan e ma.

<sup>11</sup> Fo won xa e δε balan. E bara denbaya ndee kana, barima e na e xaranfe fee nan na naxee mu daxa. E na birin nabama e yeτε xa geeni tinxintareya nan ma fe ra.

<sup>12</sup> E xa namijonme nde nan yati a fala, «Kiretikae wule nun e furi nan tun kolon. E tunnaxονο, e man jaaxu alo boximase.»

<sup>13</sup> Nondi nan yati na a ra. N na a falafe na nan ma, i xa woyen e ma a xοrοxοε ra alako e xa danxaniya a fixe ra,

<sup>14</sup> e xa ba Yuwifi xa kuye taalie danxunfe. E xa ba mixie xa yaamarie danxunfe naxee bara mεε nondi ra.

<sup>15</sup> Se birin seniyen seniyentοεε be, kονο sese mu seniyen seniyentaree nun danxaniyataree tan be. E xaxili nun e sondonyi birin bara manοxο.

<sup>16</sup> E Ala kolonfe falama e δε ra, kονο e xa wali a masenma a e mu a kolon feo! E xa fefe mu fan. Seriyε matandie nan e ra, naxee mu nοma wali fanyi yo rabade.

*Danxaniyatɔɛɛ xaranfe nɔndi ra naxan jɛɛɛ ki masenma e bɛ*

<sup>1</sup> Kɔnɔ i tan xa nu danxaniyatɔɛɛ xaran nɔndi masenyi nan na.

<sup>2</sup> I xa a masen xɛmɔxie bɛ e xa taxasi, e xa jɛɛɛ a binyamixi ki ma, e xa e yetɛ xanin xaxilimaya ra, e xa bira nɔndi nan fɔxɔ ra e xa danxaniya kui, xanunteya kui, a nun tunnabɛxiya kui.

<sup>3</sup> Na kui, i man xa a masen ginɛ mɔxie bɛ, e xa jɛɛɛ sɛniyenyi kui, e naxa findi mixi mafalɛɛ ra, e naxa siisi. E xa nu marasi fanyi fi

<sup>4</sup> sungbutunyie ma alako e xa e xa mɔrie nun e xa die xanu.

<sup>5</sup> E man xa e rasi e xa e yetɛ xanin xaxilimaya ra, e xa sɛniyen, e xa banxi walie suxu, e yuge xa fan, e xa e yetɛ magoro e xa mɔrie bɛ, alako Ala xa masenyi naxa bɛxu.

<sup>6</sup> I man xa sɛgetalɛɛ fan nasi e xa e yetɛ xanin xaxilimaya ra

<sup>7</sup> fe birin kui. I tan yetɛ xa findi misaali ra e bɛ i xa wali fanyie saabui ra. I xa kawandi xa findi nɔndi nun sɔɔbɛ ra.

<sup>8</sup> I xa masenyi xa tinxin, alako i matandimɛɛ xa yaagi, barima e mu fefe kobi kolon e naxan falama won ma fe ra.

<sup>9</sup> I xa a masen konyie bɛ, e xa e yetɛ magoro e marigie bɛ fe birin kui. E xa e rapɛlɛxin, e naxa e matandi,

<sup>10</sup> e naxa sese mɔɔɔ, e xa a masen a e marigie nɔma lade e ra ki fanyi. Na konyi mɔɔli binyɛ fima nɛ won Nakisima Ala xa masenyi ma fe birin kui.

<sup>11</sup> A lanma won xa jere yi mooli ra barima Ala xa hinne bara makenen, naxan noma findide kisi ra mixi birin be.

<sup>12</sup> A xa hinne won xaranma alako won xa gbilen tinxintareya nun dunija fee foxo ra, won xa won yete xanin xaxilimaya ra, won xa won ma dunijeigiri rapere tinxinyi nun Ala yaragaaxui kui.

<sup>13</sup> Won to na yi dunija ma, won na fe fanyi nan mamefe won xaxili tixi naxan na. Won na Ala xa Mixi Sugandixi Isa xa nore nan mamefe, won Nakisima Marigi Ala.

<sup>14</sup> A tan nan a yete fi won be, alako a xa won xunsara won ma yunubie xa fe ra, a xa jama nde raseniye e xa findi a yete gbe ra, naxee senbe soxi wali fanyie rabafe ma.

<sup>15</sup> I xa mixie kawandi yi fee ra. I xa mixie ralimaniya. I xa e rasi. I xa nondi makenen e be i senbe birin na. Mixi yo naxa yo i ma.

### 3

#### *Isayanka jere ki*

<sup>1</sup> I xa e ratu, e xa e yete magoro mangae nun mangasanyi be, e xa e xa yaamarie suxu. E xa gbata wali fanyi mooli birin nabafe ra,

<sup>2</sup> e naxa mixi yo mafala, e naxa gere so, e xa marafanyi nun boje fanyi masen birin be.

<sup>3</sup> A singe won fan nu daxupa nan nabama. Yaamari matandimae nan nu won na. Won nu bara loe kira xon. Won nu bara bira won yete waxonfe foxo ra a nun dunija fe mooli birin foxo ra, han na nu bara won findi konyie ra. Won nu won ma dunija xaninma jaaxupa, toone,

gbesɛnɔnnanteya, nun marapaaxupa nan kui. Won fan mu nu rafan mixie ma.

<sup>4</sup> Kɔnɔ won Nakisima Ala to a xa bɔɔɛ fanyi nun a xa xanunteya makenen, a naxa kisi fi won ma.

<sup>5</sup> A mu won nakisixi won ma wali fanyie xa fe xa ma, a won nakisixi a xa kinikini nan ma, won xunxafe ye xɔɔra a nun a Xaxili Seniyenxi saabui ra. Na bara a niya won xa bari a nɛɛɛ ra, won ma dunɔɔigiri birin xa masara.

<sup>6</sup> Ala bara won ki! A bara a Xaxili Seniyenxi ragoro won ma won Nakisima Isa saabui ra.

<sup>7</sup> Na kui, won ma yunubie to bara xafari a xa hinne saabui ra, won bara nɔ findide ketongoe ra, won bara won xaxili ti abadan kisi ra.

<sup>8</sup> Nɔndi masenxi nan na ki. A xoli n ma i xa na fee masen a fanyi ra, alako naxee bara danxaniya Ala ma, e xa fe birin naba alako e xa bira fe fanyi raba fɔxɔ ra. Na fee findixi fe hagige fanyie nan na mixi birin be.

<sup>9</sup> Kɔnɔ i naxa i gbe raso mixie xa wɔyɛn fufafu ya ma. E naxan falama benbae xa fe ra, e xa gbesɛnɔnnɛya, e xa gere wɔyɛnyi Ala xa sɛriye xa fe ra, e sese tide mu na.

<sup>10</sup> Naxan yo mixie tagi isoma, i xa a rasi keren, i xa a rasi firin. Xa na birin kui a mu i xui mɛ, i xa a rabolo,

<sup>11</sup> barima i a kolon a na mixi mɔoli mu fan. A bara a yetɛ danka a xa tinxintareya ra.

### *Masenyi dɔnxɔɛ*

<sup>12</sup> N na Aritema xa na mu Tikike xɛɛ i ma, i xa fe birin naba alako i xa n li Nikopoli, barima n bara a panige n xa nɛmɛ radangi naa.

<sup>13</sup> Fe birin naba alako i xa seriye karamoxo Senasi nun Apolosi mali e xa biyaasi kui. E mali, e hayi na se naxan birin ma, e xa a soto.

<sup>14</sup> A lanma danxaniyatoe naxee na won ma konti ma, e xa e matinkan tunnabexi ra wali fanyie ma, alako e xa mixie hayi xorochoe fan, e naxa fa lu na ki fufafu.

<sup>15</sup> Naxee na n fe ma be, e birin i xeebu. I xa won xanuntenyie danxaniyatoe birin xeebu muxu be.

Ala xa hinne wo birin na.

**Soso Kitaabuie: Tawureta, Yabura, Inyila**  
**The Holy Bible in the Susu language of Guinea (Soso**  
**Kitaabuie: Tawureta, Yabura, Inyila Bible)**

copyright © 2015 Mission Évangélique Réformée Néerlandaise et les  
Traducteurs Pionniers de la Bible

Language: Susu

Contributor: Mission Évangélique Réformée Néerlandaise

This translation is made available to you under the terms of the Creative  
Commons Attribution-Noncommercial-No Derivatives license 4.0.

You may share and redistribute this Bible translation or extracts from it  
in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are  
licensed just for use with those Scriptures and documents. For other uses,  
please contact the respective copyright owners.

2020-11-11

---

PDF generated using Haiola and XeLaTeX on 18 Apr 2025 from source  
files dated 29 Jan 2022

f1d08866-ea3e-5b9b-b506-e7690c5c61d2